

■ COLUMNA

Il fundament dalla CER ballucan

LEONTINA LERGIER-CAVIEZEL

Jeu concedel ch'jeu hai in summa buca investa da quei ch'ei curriu e passau – ni era buc – davos las culissas. Las diversas comunicaziuns ed intervenziuns en la pressa lain denton sminar nuot bien per igl avegnir da nosa casa editura.

Malgrad las bunas novas d'avon ver treis onns e miez. Nus Romontschs, ils scribents e las auturas, ils lecturs, ils amitgs dalla litteratura, dil plaid scret, tuts eran lu plein speranza. Finalmein ina casa editura romontscha! Con leds ed engrazievels essan nus stai cura che la Pro Helvetia, la Lia Rumantscha ed il Cantun Grischun ein vegni perina da sustener la Chasa Editura Rumantscha. Che la Pro Helvetia hagi limitau siu sustegn sin treis onns, gliez ei vegniu communicau dalla bial'entschatta. In fatg ch'ei apparentamein vegnius mess ad acta ed ha fatg puorla zana.



Ni daco giavetsch tonschan treis onns e dapl buca per contrahar en caussa, per planisar ed adattar il plan da finanziaziun? La finala cuora in bien ton aua dil Rein giuando en quei temps. Tonta ch'igl ei strusch da capir ch'ils mulins (birocratics) sappien mular aschi plaun!

Il responsabels da Cantun e Lia Rumantscha han buca saviu secunvegnir pertuccont ils mieds finanziazi, gie apparentamein gnanc davart il volumen d'in pensum da lavur adequat. Ton che LR ha concludiu da tarmetter Anita

Capaul, l'actuala menadra dalla Chasa Editura Rumantscha, da Cunclas oragiu. Silsuenter ha igl entir cussegl editorial dalla CER decidiu dad ir cun la brocca. Quei ch'ei da deplorar, jeu dubetel numnadamein che persunas hablas ed adattadas per la caussa creschien ual sin las caglias.

La lavur prestada dalla menadra vegni nuota messa en damonda, seriscudan ils responsabels. Ed ei accentueschan ch'ei seigiens perschadi dalla necessitad d'ina casa editura. Empermettan schizun ina cuntinuaziun dalla CER.

Han els en mira ina nova persuna sco «testa» dalla CER? Eisi forsa la finfinala tuttina il nas – ni sappi Dieus tgei – dalla menadra actuala che plai buca ad els? Ni ein els tuttina buca aschi prompts (sco els fan valer) da s'engaschar per la litteratura romontscha?

Jeu sun spanegiada tgei che suonda.



KEYSTONE

Nov onn, novs plazs da seduta

■ (Iq) (da sanester) Il cusseglier federal Johann Schneider-Ammann, il chanzelier federal Thomas Helbling e Corina Casanova, il president da la confederaziun Ueli Maurer, il pledader da pressa Andre Simonazzi, ils cussegliers federals Alain Berset, Simonetta Sommaruga, Doris Leuthard, Didier Burkhalter ed Eveline Widmer-Schlumpf, durant l'emprima seduta 2013.

■ NOVITADS WWW.RTR.CH

Il Vallais sa decorescha cun plimas estras

Cun ina fotomontascha carmalian ils Vallesans ils turists en lur chantun da vacanzas. La reclama porta il slogan «Jetzt losfahren... und schneller im Schnee sein» e mussa in tren da la viafier federala svizra che svanescha en in tunnel. Il tunnel è dentant al viaduct da l'Alvra. Bruno Huggler, il responsabel per il martgà da vacanzas tar la destinaziun turistica dal Vallais ha confermà che lur agentura da reclama haja fatg diever da maletgs dal traject da l'Alvra. Quest maletg hajan els duvrà en ina montascha, uschia ch'il viaduct na saja betg pli d'enconuscher.

Il directur da Grischun vacanzas, Gaudenz Thoma, deplorascha il fatg ch'ils Vallesans sajan servids da sujets dal Grischun, el ha dentant punctuà che quai n'haja naginas consequenzas per ils turistichers vallesans.

Confederaziun vul rinforzar collavuraziun internaziunala

Las relaziuns bilaterals stattan en il focus da la politica d'economia da l'exteriur da la confederaziun. Cun deliberar il rapport 2012 ha il cussegl federal suttastritgà da vulair rinforzar la collavuraziun internaziunala. Per la regenza svizra è quai ina clav impurtanta per ina buna relaziun cun ils stadis vischins e l'Uniu Europeica. Il rapport 2012 mussa che la Svizra tgira relaziuns economicas intensivias en spezial cun la Baviera, Baden-Württemberg, Rhône-Alpes e la Lombardia. Quellas contribueschan bler per rinforzar l'economia svizra.

Poschiavo – Tirano restà serrà per in mais

■ (Iq) Las lavurs da rumida en connex cun la crudada da crappa sin il binari da la Viafier Retica dal mardi en la vischinanza dal viaduct a spirala sper Brusio cuzzan probablmain in mais. Quai ha mussà in giudicat dals exponents da l'Uffizi per guaud e privels da la natira, dal geolog, da las instanzas localas forestalas e dals spezialists da la Viafier Retica. Per pudair rumir a moda segira il material ch'è vegni a val stoppia ins far sco emprim in concept da serviglianza e metter quel en funcziun. Pir lura possia ins allontanar ils circa 30 000 meters cubics material davos il rempar. Allontanar quest material saja indispensabel per pudair



La crappuna ch'è vegnida sin il binari da la Retica sper Brusio. FOTO RHB

garantir la segirtad da la viafier, per pudair segirar ils objects en la vischinanza e la via chantunala, scriva la Retica. Questa lavur vegnia a cuzzar duas emnas. Pir a la fin vegnian las rodaias reparadas. Durant quest temp porschia la Retica ina colliaziun sin via.



En noss chantun sa derasa la gripa en il mument cun ried. KEYSTONE

Meyer Burger stritga 140 piazzas

Meyer Burger stritga a Thun 140 piazzas. Il november veva il concern solar bernais gia annunzià da stritgar sin l'entir mund 270 piazzas, lura era dentant anc avert nua. Ussa èsi cler che la gronda part da las piazzas vegnan stritgadas a la sedia principala a Thun. Il concern bernais patescha gia daditg, pervi da la crisa sin il martgà solar.


Il Grischun è pertutgà fermamain da la gripa

En Svizra èn s'augmentads considerablmain ils cas da gripa. Pertutgà fermamain èn ils chantuns Grischun e Tessin. L'emprima emna dal 2013 han ils medis svizzers annunzià 96 consultaziuns pervi da gripa sin 100 000 abitants. Tenor l'uffizi federal da sanadad è il dumber sa dublegià envers l'emna avant. La limita per in'epidemia è tar 69 cas sin 100 000 abitants. Il Grischun ed il Tessin han registrà bunamain 300 cas. Pertutgadas en spezial da la gripa sajan persunas tranter 30 e 64 onns.

■ L'AURA

Pli e pli surtratg

Situaziun generala: Ina zona cun aria freida contonscha oz las Alps. Oz: En il nord pli e pli surtratg e silsuenter er precipitaziuns. En las muntognas vent dal nordvest. En il sid per part sulegliv, en Alps surtratg. Temperaturas maximalas durant il di en il nord en fin 4 grads, en il sid en fin 7 grads. Prognosa: En il nord da venderdi en fin dumengia surtratg e precipitaziuns cun naiv en fin 600 meters. La sonda per part er sitg. En il sid il venderdi e la sonda per part sulegliv, en l'Engiadina per part er surtratg e singulas precipitaziuns. La dumengia surtratg e naiv en fin 500 meters.



OZ
DIE SÜDOSTSCHWEIZ
 Olympia 2022:
 NR-Kommission
 vertagt Entscheid
Bündner Tagblatt
 30 000 m³ Felsen
 unterbrechen
 RhB-Linie
 BT und SO erhältlich an Ihrem Kiosk

Malsognas psichicas custan milliardas
Malsognas psichicas e neurologicalas chaschunan en Svizra mintg'onn custs da radund 17,5 milliardas francs.
 Quai resulta d'in studi da perscrutaders svizzers ch'è publicat en la revista Swiss Medical Weekly. Las malsognas dal tscharvè custan uschia 2600 francs per abitant. La Svizra è cun quai sin piazza set dals pajais europeics, directamain davos la Germania. Las malsognas dal tscharvè las pli charas èn depressiuns, suandadas da psicosas e demenza. Las malsognas las pli derasadas èn mal il chau e migrena, quellas custan ad onn radund ina milliarda francs.